



11. juni 2026

UPA2026/134

**Innuttaasut atsiornernik katersinermikkut siunnersuutinik Inatsisartuni suliarineqartussanik saqqummiussisarnissaat siunertaralugu Naalakkersuisut aaqqissuussinermik pilersitseqqullugit peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Pipaluk Lynge, Inuit Ataqtigiit)

Siunnersuummik saqqummiisumut qujanaq inuiaqatigiinni innuttaasunut politikikkut suliaqarnerup aammalu aalajangiinerit ingerlanneqartut pillugit annertunerusumik sunniuteqarnissamut periarfissat qanoq annertusarneqarsinnaanerit pillugu oqallinneq aallartimmagu.

Siumumit oqartussaaqataaffiup nukittuunerulernissaanik kissaateqarneq peqataaffigaarput, innuttaasut nipaata tusarneqartutut misigisaqarfigisaannik aammalu innuttaasut politikikkut aalajangiisartut akornanni ungasissuseq annertusiartunnginnissaanik. Taamaattumik pingaaruteqarpoq Inatsisartut suliaasa qanoq ineriartortinneqarsinnaanerit aammalu innuttaasut oqartussaaqataanermi peqataalluarsinnaanerisa qanoq nukittorsarneqarsinnaanerit ingerlaavartumik oqallisigissagipput.

Taamaakkaluartuq isumaqarpugut aamma saqqummiunneqartumut atatillugu pissutsit arlallit eqqumaffigineqartariaqartut.

Siullertut qinikkat akisussaaffiisa aammalu inissisimanerisa annikilliarforsinnaanerannik aarlerinartuqarpoq. Innuttaasunit qinigaavugut nunarput tamakkerlugu sinnerlugu aalajangiisarnissamut aammalu soqutigisat assigiinngitsut akornanni pisariaqartunik nalilersuisarnissamut. Inatsisartunut oqaluuserisassat annertusiartuinnartumik atsiornernik katersinikkut imaluunniit aaqqissuussinerit assingusut aqutugalugit aalajangerneqartalissappata, tamanna qinikkat demokrati naapertorlugu akisussaaffeqarnerannut atatillugu inissisimanerisa sanngiillinerannik kinguneqarsinnaavoq.

Aappaattut nunatta nunap immikkoortuini assigiinngissutaasa eqqumaffigineqarnissaat pingaaruteqarpoq. Sunniuteqarnissamut periarfissat annertunerpaamik atsiornernit amerlassusaat tunngavigalugit aalajangerneqassappata, Nuummi innuttaasut illoqarfinni nunaqarfinnilu mikinerusuni innuttaasunut sanilliullutik tapersersuisunik pisariaqartinneqartunik katersinissamut ajornannginnerusumik periarfissaqassapput. Tamanna innuttaasut agguataarneqarnerannik pissuteqarpoq. Taamaalluta sinerissami unammilligassat kissaatillu politikikkut eqqumaffigineqarnissaat ajornarnerulissinnaavoq, naak taakku pingaaruteqassutsimikkut minnerunngikkaluartut.

Taamaattumik isumaqarpugut sinniisuutitaaneq pillugu apeqqut aamma annertunerusumik isiginiarneqartariaqartoq. Innuttaasut sunniuteqarsinnaanerisa nukittorsarneqarnissaat aammalu nunap immikkoortuisa akornanni oqimaaqatigiinnerup pitsaanerulernissaa anguniarneqarpat, qinersinerni ilaasortaattissat qanoq agguanneqartarnerat misissortariaqarparput. Assersuutigalugu sinerissamiit immikkoortortanit qinigaasussanut ilaasortaattissat aalajangersimasut



atuutilersinneqarsinnaanerat misissorneqarsinnaavoq, taamaalilluni Nuuk sinneralu akornanni sinniisuutitaaneq naligiinnerulissalluni. Isumaqarpugut oqallinneq taamaattoq minnerpaamik taamak annertutigisumik eqqumaffigineqartariaqartoq.

Peqatigisaanik isumaqarpugut innuttaasut Inatsisartut sulineranni peqataatinneqarnissaasa nukittorsarneqarnissaannut periarfissat allat sukkanerumillu atuutinneqarsinnaasut pioreersut. Tassani aallaqqaasiutigalugu misissorneqarsinnaavoq Inatsisartut sulinerat qanoq ersarinnerulersinneqarsinnaanersoq aammalu innuttaasunut qanoq orniginarnerulersinneqarsinnaanersoq.

Assersuut aalajangersimasoq tassaasinnaavoq Inatsisartut nittartagaanni siunnersuutit aalajangiinerillu akuersissutigineqarsimasut kiisalu taakku atuutilersinneqarnerisa killiffii pillugit ataatsimoortumik takussutissiaq ingerlaavartumik saqqummiunneqartassasoq. Ullumikkut innuttaasut amerlasuut akuersissutigineqareernerup kingorna qanoq pisoqartarnersoq malinnaavigissallugu ajornakusoortutut misigisarpaat. Aalajangiinerit suut naammassineqarsimanersut, suut suliarineqarneranniinersut aammalu suut suli piviusunngortinneqarsimannginnersut pillugit ersarissumik killiffimmik takutitsineq ersarissutsimut aammalu innuttaasut politikkikkut sulinermut malinnaasinnaaneranunut iluaqutaasinnaavoq.

Tamanna tunngavigalugu pitsaasutut isigaarput Naalakkersuisut allannguutissatut siunnersuutaanni periarfissat, kingunerisinnaasat aammalu demokratiimut tunngasut pillugit sukumiinerusumik misissuinissaq siunnersuutigineqarmat. Siumumit isumaqarpugut apeqqut taama pingaaruteqartigisoq sukumiisumik qulaajarneqartariaqartoq, oqartussaaqataanerup ingerlanneqarnerani allannguutissat pillugit aalajangiisoqannginnerani. Taamaattumik Naalakkersuisut allannguutissatut siunnersuutaat taperserparput.

Siumumit taamaalilluta innuttaasunik peqataatitsinermik nukittorsaanissamut periutsit nutaat pillugit oqaloqateqarnissamut ammasuuvugut. Kisianni peqatigisaanik isumaqarpugut aqqiissutissat nunap immikkoortuini assigiingissutsit eqqarsaatigissagaat, qinikkat suli nukittuumik inissisimatillugit aammalu Nuuk sineriarlu akornanni naligiinnerusumik sinniisuutitaaneq tapersersorlugu.

Taamatut oqaaseqarluta amerlanerussuteqartut isumaat ataqqillugu ataatsimiititaliamut sussassaqtumut ingerlateqqipparput.